



Rodolphus Agricola Groningensis, natione Phriso, à teneris annis optimis literis institutus fuit. In patria quidem Basilium Groningensem Theologum doctissimum, præceptorem habuit. Postea uerò sese Louanium conferens Philosophiæ & liberalibus studijs operam nauauit. In ijs adeò profecit, ut faciliè omnes eo in loco superaret. Cum autem linguarum quoq; esset studiosissimus, atque intellexisset Theodorum Gazam in Italia magna gloria Græcas literas enarrare, statim sese eò contulit, & eundem magna attentione prælegendem audiuit. Cum hoc modo Græcæ & Latinæ linguæ puritatem, nec non Hebraicæ qua

lemcunq; cognitionem hausisset, Plëningerus equestri loco natus, cum quo Ferrariæ in studijs familiariter uixerat, ei author fuit ut in Germaniam reuersus sese Heidelbergam conferret. Id quod ille non grauatim fecit. præsertim cum Dalburgij authoritas accederet. Eo itaque perueniens magna omnium gratulatione suscipitur, atque honesto stipendio ornatur. Erant mores eius castissimi, & omnibus uiris bonis probati. Itaq; non modo propter famam doctrinæ, sed multo magis propter uitæ & morum grauitatem, singularem prudentiam, & omnium actionum moderationem, eius consuetudo à uiris præstâtissimis expetebatur. Consulebatur ab omnium artium professoribus, si quis inciderat nodus, ad cuius explicationem opus erat aut Historiarum, aut Latinæ linguæ, aut Græcorum autorum cognitione. Itaq; ingeniosi ab ipso admodum multa in Aristotele dexterius & simplicius tractare incipiebant.